

नागपुरी भाषा का सामान्य परिचय

नागपुरी झारखंड कर प्राचीन भासा में से एक हेके। ई झारखंड कर मुध भासा हेके। नागवंशी राइज काल में इके 'राज-भासा' कर दरजा मिलल रहे। इके सदानी, सदरी, सादरी, गंवारी, गंडली, नागपुरिया, कय ठो नाँव से जानल जात रहे मुदा आब इकर 'नागपुरी' नाँव थीर होय गेलक। आब इके पढ़ेक, पढ़ायक, बोल-चाल सउब जगन नागपुरी नाँवे से बेवहार करयँना। नागपुरी आपन मुध रुप में सदानी नावों से जानल जायला।

ई सदान मनक मातृ-भासा हेके सेले सदानी कहल जायला।

हियाँ कर गैर आदवासी के सदान कहयँना।

नागपुरी नाँव हियाँ कर स्थानीयता अस्मिता आउर परम्परा से जुड़ल हय।

नागपुरी भासा जोन क्षेत्र कर सम्पड़त हेके उकर पुरना नाँव चुटिया नागपुर रहे।

नागवंशी मनक एहे चुटिया नागपुर ठाँव, काल-क्रम कर
बहाव में नागपुर नाँव से जानल गेलक आउर इकर भासा,
संस्कृति नागपुरी नाँव से।

वर्तमान नागपुरी भासा आपन सउब सराप से मुक्त
होयके धोवल चांद लखे दपदपात हे आउर उन्नति कर
डहर बटे सोझात हे । नागपुरी कर बाबइत वइसे तो ढेइर
विद्वान, बुद्धिगर मन बरन-बरन कर बिचार दे हँय मुदा
इमन में सउब से बेस, **सुपटउवा बिचार फादर पीटर**
शान्ति नवरंगी कर बुझायला- “छोटानागपुर कर जंगल-
पहार में एखनों ढेइर पुरना-पुरना बस्ती आउर गढ़ मन
भेटायँना। सोनपुर परगना कर पुरना गढ़ जहाँ दित वंश
कर राजा कर राइज रहे, उकरे से कटिक दूर में पेटी पहार
कर हैंठे दोसर-दोसर गढ़ो मनक चिन्हा भेटायला। इसन
ठाँव मने आउरो-आउर जगन मिलयँना।

ई बस्ती आउर गढ़ केकर रहे? हामर बिचार हय कि
ओहे **निषाद** मनक होइ जेकर वंशज देहाइत गाँव में बसेक
वाला सदान कहायवाला अदमी मन हेकँय।”

पंडित योगेन्द्र नाथ तिवारी कर बिचार हय कि “शरत चन्द्र राय उल्लेख कइर हँय कि उराँव जाइत, कर सामाजिक बेवस्था मजगुत करेक ले लोहरा, महली, गोड़ाइत, घाँसी, कुम्हार मन कय जाइत भेटायँना एहे जाइत मन सदान कहायँना।

उराँव मनक माझे इमने कहिया से हँय, ई कहेक कठिन हय मुदा हियाँ ढेइर पुरना सभ्यता कर चिन्हा भेटायला । जइसे मांडर थाना में कोइल नदी कर अररा 16x10x3” वाला ईटा कर नेंव, लोहरदगा थाना में बिराटपुर कर ईटा, कोराम्बे कर प्रसिद्धवासुदेव राय कर मुरति, बेड़ो कर शिव मंदिर,टांगीनाथ कर त्रिशुल सबूत देवेला कि ढेइर पुरना परिया से हियाँ सउब जाइत आउर संस्कृति रइह होइ। जब जाइत रहे तो उकर भासा होबे करी। बुझायला एहे भासा गोटे पसरल रहे।”

डॉ. बी. पी. केशरी कर मोताबिक- “नागपुरी क्षेत्र कर पुरना इतिहास जीवन्त आउर प्रभावशाली रहे आउर नागपुरी

भासा-भासी आर्य मन पुरनाय परिया से हियाँ कर माटी-
पानी में एकाकार होय गेल्यँ।“

डॉ. भुनेश्वर अनुज आपन शोध प्रबन्ध **नागपुरी लोक-
साहित्य** कर **आभारोक्ति** में नागपुरी भासा कर बाबइत
कइह हँय कि “ हियाँ विभिन्न प्रकार कर जन जाइत
रह्यँना उमनक आपन भासा साहित हय मुदा इमन ले
नागपुरी भासा एगो पुल (सेतु) तइर हय, ई भाषा कर
बेगर ई क्षेत्र में केकरो काम चलेक मसकिल हय।“ इकर
से साफ पता चलेला कि नागपुरी भासा कतना पुरना
आउर महत्वपूर्ण हय।

फादर बुकाउट एहे सच कर झरोखा से हुलइक के कहलँय-
“अगर नागपुरी

कर पुरना स्वरूप के मानल जाय तो ई बात साबित होय
जायला कि छोटानागपुर में आर्य मन बहुते पहिले आय के
बइस जाय रहँय।“

डॉ. कुमारी वासंती कर मत हय कि “नागपुरी भासा झारखण्ड में जनजातीय भासा मन कर संगे आउर उमनक आपसी सहजोग से आपन विस्तार करलक। ई सउब हियाँ कर नागपुरी, उराँव आउर मुण्डारी गीत मन में सफा दिसेला।”

ई लखे नागपुरी कर बाबइत एतना तो बेगर कोनो सक-सुबहा के कहल जाय सकेला कि ई झारखण्ड कर बहुते पुरना भासा हेके, संगेहे हियाँ कर सम्पर्क भासा हेके। हियाँ कर आदिवासी मन एक दोसर कर भासा नि जानँय तो इमनक माझे संवाद करेक ले आखिर कोन भासा रइह होइ? उत्तर में ई कहेक में कोनो संकोच नी बुझायला कि नागपुरीये इमनक सम्पर्क भासा रहे आउर एखनो हय।

एतने नइ कय ठो आदिवासी मनक तो ई मातृभासा हेके,
चीक बड़ाईक,

लोहरा खेरवार, असुर, बिरजिया, कोरवा कर संगे घाँसी,
गोड़ाइत महली, तुरी, पांङ्ग मनकर मातृभासा नागपुरी हेके।

कय जगन तो उराँव, मुण्डाव मन मातृभासा कर रूप में
नागपुरिये कर परयोग करयँना।

पहिल सताब्दी से 1947 ई. तक तो ई अधिकारिक रूप से
झारखण्ड कर 'राज-भासा रहइ चुइक हे, जेकर सबूत पुरना
चिट्ठी पतर, पट्टा, सिला- लेख मन में भेटायल।